

HEADLINES

1. Ram zalenna ni vawi 79-na, ram pumah ropui taka lawm a ni.
2. Mizoramah pawh India ram zalenna ni champaha hi ropui taka lawm a ni a, Chief Minister Pu Lalduhoma'n hmachhawp tam tak la tih loh te tipuitling turin theihtawp an chhuah tih hriatpui turin mipuite a chah.
3. Zalenna ni hi Mizoram District hrang hrangah pawh lawm a ni.
4. Larsap chuan Lai autonomous district council (LADC) chief executive member (CEM) Pu V. Zirsanga banna a pawm a, UDA hruaitu Pu N. Zangura chu CEM atan a ruat.

<><><>

I-DAY – NEW DELHI

Independence Day vawi 79-na chu ram pumah ropui leh urhsun taka lawm a ni a, a lawmna pui ber, New Delhi Red Fort-a neihah Prime Minister Narendra Modi-a'n hnam puanzar a pawt pharh a ni.

Ram mipuite hnenah thuchah sawiin Prime Minister chuan Operation Sindoor chu ram sipaite huaisenzia leh finzia tarlangtu pawimawh tak a ni, a ti a, he beihpuia tel sipai huaisen tak takte, chibai bukin ruahmanna zawng zawng, sipaite kutah sorkarin a hlan a ni, a ti a, Indus lui tui inhmantawm tura inremna siam dan kalphung fel tawh loh zia, ram a hriat tawh thu sawiin nuclear hmanga invauna, India-in a enliam mai mai tawh dawn lo, a ti bawh.

Hmelmaten ralthuam hlauhawm siam an tumna tihhlawhchham sakna turin India-in Mission Sudarshan Chakra kalpui a tum thu, Pu Modi-a chuan sawiin kum 10 lo awm tur chhung, 2035-ah chuan ram venhimna chu thiamna sang hmanin thuam chak a ni ang, a ti a, loneitute leh sanghamantute tan bang anga a din tur thu sawiin an hmakhaw thatna tur dal zawngin India-in engmah a ti lovang, a ti.

Pu Modi-a hian thalai hna hmu thar-ten thla tina cheng sing 1 sang 5 an dawn theihna tur, cheng vbch nuai 1 hu, employment scheme a hawng bawh.

<><><>

DAY-CM

Chief Minister Pu Lalduhoma'n Mizoramah chuan Pathian ram lo thleng se an duh ber thu sawiin, hmachhawp tam tak la tih loh te tipuitling turin theihtawp an chhuah tih hriatpui turin mipuite a chah.

Wawiina India ram zalenna ni vawi 79-na Aizawl Lammuala lawmna-ah Pu Lalduhoma chuan 'Kalphung Thar Mipui Sorkar' tih thupui hmangin "Kalphung thar" policy hnuaia hmalakna thar an neih te a tarlang a. Eiruk leh hlemhletna chu sorkar hmalakna tithuanawptu ber a nih avangin, ngaih pawimawh hmasa-ah an nei nghal tih sawiin Corruption do dan thar an duan zingah CBI hnena General Consent pek te, mipuite'n sorkara an thil thlen te tikhawtlai a nih loh na'n Right to Public Services Act 2025 tlawhchhana subject tihpun te, Project tikhawtlai te, hnathawh chhiate a awm tawh loh nan a endiktu tur Project Monitoring Committee din a nih thu te a sawi a. Lok Ayokta tihchangtlun a nih thu te, Retailer-ten buhfai an sem bang hralh awih a nih tak loh avanga, kum khat chhunga buhfai quintal sing tel an hum theih tak thute a sawi bawh.

Chief Minister chuan Project tam tak hman zuina tur awm lo te, enkawl zui hautak lutuk vanga sum tam tak, awmze nei lova a luan ral tawh loh nan leh project a hman dan tur dik taka tangkai taka enkawl a nih theih nan Project Kalphung thar an kalpui thute a sawi a. Inrenchem an puan avanga leiba a tlakhniam tawh thu te, sum

dinhmun a ziaawm chhoh zel thute sawiin sorkar chuan Health Care Bill tang zawng zawng a rul zo vek tawh, a ti a, Health Care Scheme thar hnuaiah state chhungah a thlawnin mi 21,087 enkawl an nih tawh thu leh phai lamah mi 88 enkawl (referred) an ni tawh tih a sawi bawk.

A thlawnin mitthi ruang 1,000 phurh a nih tawh thu pawl sawiin chhungkaw 23,110-te Pension Case (First Formulation) chinfel a ni tawh a ti a. Sorkar hnathawkte DA chu za zela 4 a tihpunsak tawh chu tipung leh turin tan an la mek a ni, a ti a. Power Bill tang an chhawm zawng zawng pawh an rul zo vek tawh nia sawiin Bill pek tlai vanga surcharge an lo chawi thin chu an chawi ngai tawh lo a ti a. A hun taka bill an pek tak avangin lawmman (rebate) cheng vaibelchhe 3 leh nuai 55 chuang an dawng tawh tih sawiin, Mizoramin Power Bill a bat ngai tak loh avangin Power Trading-ah cheng vbc 131 chuang man an hralh tawh a, chuta tang chuan cheng vbc 61 chuang an hlep tawh tih a sawi bawk. Chief Minister chuan contract hnathawh pawh tha zawka kalpui a nih theih nan phalna la hmasa lova departmental work thawh leh restricted tender tih phal a ni lo a. Work order te, administrative approval te, expenditure sanction te awm lovin eng hna mah thawh phal a ni tawh lo a, tun hma ngaihtuahin hna chhia hmuh tur a tlem tial tial a, sorkar chuan he mi kawngah hian tha a thlah dawn lo a ti a.

Kawng chungchang pawh sawiin, kawngte a lo tlo zawk na'n, Paver khawl luh theihna chinah B.C system hman tan a ni a, kum tluana hna thawh a nih theih nan, kawngpui pawimawh chin te chu Rigid Pavement hmanga thawh phalna central-ah dil mek a ni a ti. Kawng siamna tikhawtlai thintu ber Forest Clearance chu state sorkarin a pek ve theihna turin, kawng pawimawh zawng zawng te chu National Strategic Importance-a puansak turin Prime Minister leh Defence Minister dil mek a ni a ti a. NHIDCL Managing Director nen Delhi-a an inhmuh tumin, Vairengte leh Sairang inkar Short Term Maintenance Contract hna atan cheng vbc 59.05 an sanction fel tawh thute, tunhma a kawngpuiin a paltlang, tuna a tlawh tak loh hmun 5 te chu kalkawng hlui maintain leh vek tura an ruahman thu te, NH – 302, Lunglei leh Tlabung inkar kawngpui chu NHIDCL kuta hlanin, Bangladesh ram thleng kawngpui thlur hnih a an siam tur thu a sawi bawk a ni.

Chief Minister chuan kalphung thar hnuaia hma an lakna hrang hrang - Aikal tihtawp thu te, Sorkar hnaah qualify chauh lak a nih tawh tur thu te, Mizote chu eng hnam nge kan niha, tu thlahte nge kan nih official-a pawm tlak a kan neih theih nan 'Hnam Tobul Chhuichhuaktu' tur din a nih thu a sawi bawk a ni

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

DAY: DISTRICTS

India ramin zalenna a hmuh vawi 79-na chu vawiin khan Mizoram District hrang hrangah lawm a ni. Lungleia District-a a lawmna pui ber, C. Thuamluaia Mualaah chuan Home Minister Pu K. Sapdanga'n a hmanpui a, India Hnam Puanzar pawt pharhin, Hnam Puanzar chibai buku parade contingent 27 te chibai buk a chhang let a. Independence Day thuchah a sawi nghal a ni.

Serchhip District-a a lawmna pui ber Serchhip Sports Complex-ah chuan khuallian Supply Minister Pu B.Lalchhanzova chuan hnam puanzar pawt pharhin, parade contingent-te chibai buk a chhanglet a. Siaha-ah chuan SDFA Ground Meisatla-ah Health Minister Pi Lalrinpuii chu khuallian niin Hnam puanzar a pawt pharh a, parade contingent 23 te chibai bukna a chhanglet a ni. Mamit-a GSA Playground-ah chuan Art & Culture Minister Pu C. Lalsawivunga'n chu khual lian niin hnam puanzar a pawtpharh a. Khawzawla Mualvawm Field-ah chuan Agriculture & Farmers' Welfare, Minister Pu PC. Vanlalruata chu khuallian niin, hnam puanzar a pawt pharh a ni.

Hnahthial District Turf Ground-ah chuan khuallian, Power & Electricity Minister Pu F.Rodingliana chuan India Hnam Puanzar pawt pharh a. Lawngtlaiah chuan CYLA Play Ground-ah PHE Minister Prof. Lalnilawma chuan India hnam puanzar a pawt pharh a. Kolasib Sports Stadium, Project Veng-ah PWD Minister Pu Vanlalhlana chu

Khuallian niin, hnam puanzar pawt pharhin Parade Contingent-te chibai a chhang let a. Saitualah chuan Education Minister Dr. Vanlalhlana'n hnam puanzar a pawt pharh a. Thenzawla Lothazawlah chuan Adviser to Chief Minister (Finance) Pu TBC Lalvenchhunga chu khuallian niin, hnam puanzar a pawt pharh bawk a ni.

<><><>

KIRTI CHAKRA

Captain Lalrinawma Sailo (IC-88733Y) 4 PARA (Special Forces), indo lai ni lova sipai chawimawina sang ber dawttu Kirti Chakra dawng tura thlan a ni chu larsap Gen. V.K. Singh chuan a lawmpui thu a sawi.

Larsap chuan a Instagram account ah Capt. Lalrinawma Sailo chu Kirti Chakra dawngtu tur 4 chauh thlan chhuah zinga tel a ni chu ropui a tih thu leh Mizo zinga he chawimawina kum 1968 a lo dawng tawhtu Subedar Chalhuna Lushai dawta dawng leh hmasa ber a nih thu a sawi a. A huaisenna leh mahni hmasial lova hna a thawh dan chu Mizoram leh India tan chhuanawm tak a ni a ti a. A hma lam hunah hlawhtlinna nei zel turin duhsakna a hlan bawk a ni. Chief minister Pu Lalduhoma, home minister Pu K. Sapdanga leh Sports minister Pu Lalnghinglova Hmar te pawhin social media hmangin Capt. Lalrinawma Sailo lawmpuina thu an ziak bawk a ni.

<><><>

GALLANTRY AWARDS

Vawiin Independence Day pualin Police, Fire, Home Guard leh Civil Defence & Correctional Services mi 1090 hnenah huaisen chawimawina leh hnathawk tha chawimawina hlan a ni. Union Home Ministry sawi danin, mi 233 hnenah Medal for Gallantry hlan a ni a, mi 99-in President’s Medal for Distinguished Service an dawng a, mi 758-in Medal for Meritorius Service an dawng a ni.

<><><>

HOME MINISTER

Home minister leh prominent journalist nibawk Pu K. Sapdanga chu vawiin khan Lunglei Press Club a tlawhna-ah Lunglei district MJA-te’n ngaihhraina leh chawimawina thuziak an hlan.

Pu K. Sapdanga chuan chanchinbumite hian mipui beisei pha kher lo mah se an hnathawh hi entleu theih a ni lo a ti a. Chanchinbumite’n welfare fund an neih theihna turah mi tangkai engemawzat an awm chungin IPR minister hlui Dr. R. Lalthangliana chuan a thawh hlawk hle a ni a ti a, official lamin harsatna an sawi pawhin a titlang zel a ni a ti. Soft copy a chanchinbu chhuah leh hard copy a chhuah hi a hautak dan a in ang reng tho a ni tih sawiin hard copy a la ti hram hram te pawh an fakawm tih thu sawiin a chanbinbu tak tak a sem erawh a ni vak tawh lo a ti a. Lehkha phekk a in teh hi a ni ber a ni tawh lova, thu thar mipui hnen a ngaihdan va chhawp sak kha chanchinbumite an pawimawhna lai ber a ni a ti. Soft copy a ni emaw, visual leh audio engpawh ni se mipuiin an chhiar theih kha a hlutna lai ber a ni a ti.

<><><>

LADC

Larsap Gen. Vijay Kumar Singh chuan Lai autonomous district council (LADC) chief executive member (CEM) Pu V. Zirsanga banna a pawm. Puan tawh angin Pu V. Zirsanga hian LADC MDC te zingah thlawptu a ngah leh ngah loh nimin khan fiah tur a ni a. Dar 10 leh a chanve a fiahna atana council hall-a an kalkhawm hma lawkin larsap hnenah CEM atanga a banna chu LADC chairman Pu T. Zakunga kaltlangin a thehlut a. Chairman hian a banna lehkha hi council inkhawmah hian chhiar chhuakin fiahna hun hman a ni ta lova. A banna hi nimin kha larsap chuan a pawm nghal a. Larsap hian BJP hruaitu leh united democratic alliance (UDA) legislature party-in hruaitu atana an thlan Pu N. Zangura chu LADC CEM atan a ruat nghal tih district council & minority affairs department chuan vawiin khan hriattirna an chhuah nghal a. Kar leh Thawhlejni (August ni 19) khian LADC inkhawm koh a ni a, hemi ni hian Pu N. Zangura hian MDC thlawptu a ngah leh ngah loh finfiah a ni dawn a ni. Tun dinhmun ah LADC ah mipui thlan MDC 25 zingah MNF-in 11, BJP 2 leh pawnlam atanga thlawptu Congress Member 1 nen UDA chuan Member 14 neiin, ZPM in Member 11 an nei mek a ni.

<><><>